

**1240-1240- OFP - Acta Capitulum Generalium Parisius Celebrati**

Acta capituli generalis Bononie celebrati  
anno Domini · M° · CC° · XL° ·

Revocamus hanc constitutionem. De tercio in tercium annum; mittantur visitatores per provincias a capitulo generali etc.

Item. Hanc. Lectores quamdiu possunt lectionis officium exercere; in priores conventuales nullatenus eligantur. sed nec [in] diffinitores etc.

Item. Constitutionem de ornamentis [sericis] non habendis.

Approbamus. quod non habeamus nisi unam campanam ad omnes horas.

Item. Quod non habeamus ymagines sculptas.

Approbamus hanc constitutionem. Hec ordinatio et correctio. et additio. ab omnibus universaliter observetur. Et hec habet · ii · capitula. Hoc tamen addimus. Fratres nostri sedeant ad Laudate. sicut prius.

Item fratres nostri layci. dicant · d · pater noster.

Item. Si quis in proclamacione sua iurgium fecerit. ponatur in levi culpa. post illud verbum. vindicando clamare presumpserit.

Item. Ubi dicitur de annunciacione mortis magistri. addatur quod domus Parisiensis. annunciet provincie Dacie. Bononiensis vero Polonie. Terre sancte. Grecie. et deleatur de constitutionibus illud. aliis quibus poterit.

Item. Ubi dicitur. Scripturam publicent in medium. addatur. expressis nominibus eligencium et electorum.

Item. Ubi dicitur de diffinitore. vel in priorem provincialem electus fuerit. addatur. et confirmatus.

Item. Ubi dicitur in constitutione de priore conventuali eligendo. secundum formam canonicam eligatur. addatur. videlicet a maiori parte medietate eligencium. vel per compromissionem vel per communem inspiracionem. aliis iuris subtilitatibus relegatis. quod similiter in electione magistri ordinis. et priorum provincialium observetur.

Item. Quod dicitur in gravi culpa. si indumenta vel alii alia data fratri vel concessa. sine ipsius licencia alius acceperit. etc. ponatur in titulo de levi culpa. post illud. negligenter tractaverit.

Item. Predicatores et eciam alii fratres itinerantes. sint contempti officio illorum ad quos aliquando declinant. residuum amoveatur.

Item. Frater qui in alienam provinciam ad legendum mittitur; omnes libros suos glosatos. postillas. bibliam et caternos secum deferat. Et si simpliciter illi provincie. ad quam mittitur assignetur; libri quos habuit de provincia de qua mittitur. ipso mortuo ad illam provinciam pertinebunt. Alii vero omnes sint illius provincie ad quam mittitur. sive in via sive in provincia moriatur. Si vero ad tempus mittitur; omnes libri ad provinciam de qua assumptus est revertantur.

Item. dicimus de missis de provincia non ad regendum. non tamen portent nisi bibliam et breviarium. Item. Ubi dicitur. quod socius obediat in omnibus predicatori; removeatur. in omnibus. Item. Ubi dicitur. Predicator non audeat. etc. nisi habeat mandatum generale. etc. removeatur generale. Item. In suffragiis defunctorum. removeatur quod dicitur de sociis magistri et priorum provincialium. Item. Removeatur quod dicitur de Cisterciensibus recipiendis absque domini pape licencia speciali. Item. Benedictio post completorium non detur. et hec additio et subtractio habet unum capitulum.

Item. Approbamus. ut · iiiior · provincie videlicet. Polonia. Dacia. Ierosolimitana. Grecia aliis octo provinciis per omnia aequentur. tam in duobus electoribus magistri; quam in habenda potestate quam habent priores provinciales. magistro ordinis mortuo vel amoto. Et hec habet · ii · capitula.

Item. Inchoamus has constitutiones. Generale statutum ordinis vel consuetudinem diu obtentam et communiter in ordine approbatam. neque magister ordinis. neque priores provinciales aliquatenus valeant immutare nisi per tria capitula fuerit approbatum.

Diffinitores excessum magistri; seorsum corrigant et emendent. quod si prevaricator ordinis fuerit aut contemptor. aut adeo negligens et remissus. quod ordinis dissolutionem inducat; moneatur a diffinitoribus. ut magisterio cedat. et locum ad manendum sibi eligat. Alioquin amovendi ipsum ab officio. liberam habeant potestatem. et alia forma removeatur.

Item. Statuimus. ut ornamenta pannorum tam altaris quam ministrorum sint absque lapidibus preciosis et auro. preter aurifrisium. et quod solus ebdomadarius cappa serica tam in choro quam in processione utatur. Et iste constitutiones habent unum capitulum.

Item. Frater. qui dum esset in seculo. provinciam in qua natus est omnino dimisit et ad aliam se transtulit. domicilium commutando. sit illius provincie in qua domicilium habuit. nisi de eo per magistrum ordinis vel generale capitulum aliter ordinetur.

Admonemus ut in festo · ix · lectionum dicatur ad primas vespervas. Transit pauper. ad secundas. O lumen. pro memoria.

Item. Fratres nostri diligenter admoneant populum. ut ecclesias et prelatos honorent. ut ecclesiis reddant iura sua.

Item. Priores non mittant ad predicandum. nec ad confessiones audiendas instituant fratres nisi discretos et maturos.

Item. Fratres nostri vinum et bladum non accumulent nisi ad presentis anni necessitatem. quod bona fide servetur.

Item. Fratres curias regum vel principum absque magna neccessitate. seu fructu animarum. frequentare non presumant. nec testamentorum executores fiant.

Item. Fratres nostri itinerantes habitum nisi de sui prioris provincialis licencia speciali non transforment. nec sint prelatis suis nimis importuni pro impetranda licencia exeundi. nisi neccessitas vel evidens utilitas hoc exposcat. sed nec faciles reddant se priores. vel exhibeant ad huiusmodi licencias concedendas.

Item Fratres non eligant. vel postulent sibi priorem. nisi ille qui preest; fuerit primitus amotus. nec eciam sub condicione. si contigerit eum amoveri.

Item. Non vadant ad domos secularium vel clericorum pro funeribus aportandis. nec recipiant ea cum scandalo evidenti.

Item. Fratres nostri proprios currus vel equos non habeant. nec eciam alienos in domibus suis teneant. nec servientes seculares habeant plus quam duos vel tres. nisi propter neccessitatem per priorem provincialem dispensetur. Pro servitoribus vero in domibus nostris carnes nullatenus preparentur.

Item. Fratres hospites secundum quod magis vel minus laboraverint in itinere diucius et commodius procurentur.

Item. Qui adeo infirmi et debiles fuerint. quod neccesse habent carnibus recreari. sive sint priores sive alii; extra claustrum non exeant. et si aliquando occasione capituli vel alia neccessitate exire contigerit; non equitent nec quadrigent. nec carnes comedant. nisi in via adeo gravis infirmitas superveniat. quod aliter fieri sit neccesse. et tunc ad suos conventus revertantur. Possit tamen prior provincialis aliter dispensare.

Item. Lecti nostri in dormitorio vel alibi nullis intermediis obumbrentur. Poterit tamen in extremitatibus lectorum; in altitudine unius cubiti usualis a superficie cervicalis aliquod medium lignum vel plastreum interponi. Et hoc intelligimus. nisi celle cum lectis coniunguntur. ubi autem aliter factum est. emendetur.

Item. Nulli hospiti seculari recepto in domo nostra. lectus cum linte aminibus a fratribus preparetur. sed si secum ea detulerit poterit sustineri.

Item. Fratres studentes Parisius qui sunt pro lectoribus assignati. in ferialibus diebus ad completorium tantum venire teneantur. In festis vero · ix · lectionum. in aliis horis. nisi remanserint de licencia speciali eos volumus interesse. nec ad officium infirmarie scribantur.

Item. Prior provincialis. cum diffinitoribus capituli provincialis. visitoribus provincie conventus dividat visitandos. prout viderit expedire.

Item. Carceres fiant ad compescendam insolenciam perversorum.

Item. Provideatur lectoribus in libris. ut scriptum est. et in cibis neccessariis. ut possint laborem studii sustinere.

Item. Nullus remittat fratres ad suas provincias. sine licencia magistri ordinis. vel nisi a prioribus provincialibus. de quorum provinciis oriundi sunt; repetantur.

Item. Libri non vendantur. nisi alii magis neccessarii. ex illa pecunia ementur.

Item. Nullus aptus et ydoneus recipi. propter defectum vestium repellatur. sed studentes pro provinciis prout commodius poterunt provideant sibi vestes. et provincie ad quas pertinent pecuniam illam persolvere teneantur.

Item. Fratres nimis iuvenes et indocti. non multiplicentur. nec predicatorum generalium numerus. absque diligenti cautela et debita augeatur.

Item. A prioribus procuretur. ut lumen maius in nostris dormitoriis et cameris privatis universaliter habeatur.

Item. Studentes mittantur Parisius a priore provinciali de concilio diffinitorum capituli provincialis.

Item. Notabiles superfluitates a choris nostris penitus removeantur. et amodo alie in nostro ordine numquam fiant.

Item. Novicii nullam curam rerum suarum. nec occasione librorum retineant. sed priores procurent eis libros. secundum quod ex rebus eorum poterunt et viderint expedire.

Item. Nullus faciat sibi sigillum fieri. nisi predicator fuerit generalis. et qui aliter habent. usque ad instans capitulum provinciale reddere suis prioribus teneantur.

Item. Nullus sigillum habeat curiosum. nec excepto magistro ordinis. in sigillo suo faciat fieri crucifixum.

Item. Monemus. ne fratres nostri a modo religiosis mulieribus sacramenta preter penitentiam administrent. Qui vero contrarium attemptaverint. post generale capitulum. quod fuit Bononie ultimo

celebratum. cum eis tunc fuerit inhibitum et acriter reprehensum. ieiunent · vii · dies in pane et aqua et dicant · vii · missas de sancto spiritu et · vii · psalteria et · vii · recipiant disciplinas.

Item. Priori Regino iniungimus · iii · dies in pane et aqua et tria psalteria. et · iii · missas de spiritu sancto. et paret se ad disciplinam. et cuilibet fratri qui interfuit · i · diem in pane et aqua et · i · missam et · i · psalterium. et · i · disciplinam.

Item. Frater Bartholomeus privetur biblia propter modum notabilem acquirendi. et paret se ad disciplinam. et faciat penitentiam sibi a vicario iniunctam. De hiis qui non debuerunt venire ad capitulum. et venerunt sine licencia. Item. Culpe sociorum prioris Brixiensis. in inquisitione episcopi reserventur priori provinciali.

Item. Visitoribus qui non visitaverunt; iniungimus · v · dies in pane et aqua et · v · psalteria. et totidem disciplinas in capitulo. et illis qui non scripserunt ut debuerunt · iii · dies et tres disciplinas.

Concessionem domorum. Concedimus duas domos. provincie Ungarie; unam ponendam in provincia Silvana. Dacie; · ii · secundum quod videbitur capitulo provinciali. Francie; · i · ponendam in Altisiodoro. Polonie; · I · secundum quod videbitur capitulo provinciali.

Suffragia.

Pro domino papa quilibet sacerdos · iii · missas de beata virgine. clericus psalmos. conversi · d · pater noster.

Pro fratre R[aymundo] quondam magistro ordinis. fiat post mortem; sicut pro magistro ordinis. Pro electione magistri futuri. quilibet sacerdos · i · missam de sancto spiritu. quilibet conventus · i · clericus · vii · psalmos. conversus · c · pater noster.

Concedimus et confirmamus fratrem Stephanum. in priorem provincialem provincie Grecie.

Interpretacio de silencio mense revocetur.